

Supersticiones y melecina popular

Notes etnográfiques arrecoyíes en Palacios del Sil

ROBERTO GONZÁLEZ-QUEVEDO GONZÁLEZ

1. SUPERSTICIONES

Queden en Palacios una riestra creencies típicamente supersticioses. Estes creencies tienen entovía munchu raigañu na xente vieya y van esaniciándose na más nueva.

EL SAPU. — Hai qu'andar con munchu cuidiáu colos sapos, pos si se-yos enfada o pon de mal humor echen el *meixu*, que ye un líquidu venenosu. Si'l *meixu* toca a ún nos güeyos, déxalu ciegu.

LAS CULUEBRAS. — Anicien de los pelos de mujer que caen al agua. Si una mujer péñase al llau d'una fonte, los pelos que van al agua fainse culubres, con cabeza na parte del pelu que taba na piel. Les moches y mujeres en xeneral tienen que precucurar nun s'arimar demasiáu a les fontes, pol peligru que se cuerre. Dizse tamién que *las culuebras* manen la lleche les vaques, metiéndose peles cortes y zubando los tetos. Cuandu pechen páxaros y otros animalinos pequeños ye porque los hipnoticen enantes.

CURUXAS YA GARABOS. — Siempre que se-yos siente pela nueche ye porque abarruenten que va pa-

sar daqué malo. El gárabu canta «cavar, cavar» pa dir avisando que fai falta una furaca pa enterrar al qu' esa nueche va morrer.

LOS PERROS. — Si los perros pasen tola nueche aullando, eso quier decir tamién que dalquién va morrer.

LA SACABERA. — La sacabera tien una mordedura venenosa que produz la muerte:

*si te muerde l'escurpión,
la pala ya la batedera;
si te muerde l'escurpión,
la pala ya l'inxadón.*

LAS PANTASMAS. — Dizme un informante que la xente d'antes creía 'n munches bobaes, comu «las pantasmas». Pero al momentu asegura qu'él alcuérdase d'una pantasma qu'había tres un portón: el mieu que-y tenía a la pantasma faía que siempre pasase corriendo.

EL TRASGU. — Esti ser mitolóxicu anda siempre estracamundiando les coses y poniéndoles al revés. Cuando se mete dientru d'una casa ye perdifícil sacalu. Un informante cuéntame comu verdadera la hestoria d'un trasagu que dormía tolos días con dos hermanes vieyes. Ocurrióse-yos a éstes marchar a vivir a otra casa del pueblu pa vese llibres del trasgu pero, el mesmu día que cambiaron pa la casa nueva, apaició 'l trasgu na puerta. Al perguntáy-les vieyes «¿Usté qué fai aquí?» contestó'l trasgu: «Aio, ¿nun andamus de casa mudada?».

EL SUMICIU. — Cuandu nun s'atopa daqué y paez que desapaició mesteriosamente, recórrese al sumiciu, comu ser capaz d'escondelo too. Si dalguna cosa nun apaez, úsense frases comu:

¡Paez qu'anda'l sumiciu!

EL MAL DEL GÜECHU. — Esta creencia tuvo muchu raigañu, pero agora queda namás na xente más vieya. Pa defendese llévense unes cuentes d'azabache dientru d'una bolsina pequeña prendía na ropa. El mal de güeyu tien que ver tamén colos animales domésticos, especialmente les vaques y los tenrales.

La muerte d'un neñu solía atribuíse a dalguna bruxa que fixera'l mal.

LAS SALUDADORAS. — Cuenten los más vieyos que, antiguamente, había unes mujeres (*saludadoras*) que sabíen ónde taba'l ganáu perdíu. Tamién informaben de si taba'n peligru o non. Estes mujeres tenían una cruz umbaxu la llingua. Entovía queda'l refrán:

comes más qu'una saludadora

que resulta significativu so la idega que la xente tenía d'estes adivines.

LOS ENDEMONIAOS. — Hasta la llegada apocayá de la melecina científica, decíase de les presones de comportamientu raru, quiciabes enfermos nerviosos, que taben endemoniaes. Por exemplu, cuéntenme'l casu d'una mujer d'un pueblu vecín que decíen que taba endemoniada y que recibía esti tratamientu: ponién-y nel pechu tortielles y farrapes de xamón «pa que los diablos comiesen».

LA TUENA. — Cuandu'l cielu se pon preparáu pa una tuena, sáquense al corral el *serradoiru* y la *pala'l fornu* y pónense cruxaos ellí pa «escunxurare» la tuena.

2. MELECINA POPULAR

La información a tolos niveles y la seguranza, ca día más grande, que de melecina científica y profe-

sional van esbarrumbando un ensame idegues qu'an-
tes tuvieron un fondu raigañu, comu éstes:

EL MIEL. — Xuntándose miel y *malvariscu* com-
bátense les ixnies, fayendo gárgares.

El miel ye tamén perbonu pa los golpes, un-
tando con él la parte mala del cuerpu.

APIU. — Úsase escontras les llombrices y pa ba-
xar la fiebre. Hai que lu mayar y remesturar con
mantega de gochu.

LA MOÑICA. — La moñica úsase pa sacar d'una
ferida lo que ta fayendo la infección.

EL MANRUBIU. — Esta planta alta y de flores
marielles val pa curar la tericia. Hai que mexar en-
riba d'ella pela mañanina antes de salir el sol. Mien-
tres se *meixa* hai que decir:

*A vete manrubiу vengu
antias de que día'l sol,
pa que me quites la tiricia
ya me vuelvas la color.*

L'UNTU D'OSU. — Ye bonu pal rema. Cuandu se
mata un osu hai que-y sacar l'untu y guardalu pa
usuallu n'esfriegues.

LA CAMISA LA CULUEBRA. — La piel de la cu-
luebra val pa baxar el dolor de mueles, apegándola
a éstes.

L'AUGUA DETENIDA. — Si se tien sede y namás
s'atopa agua detenida y, poro, peligrosa, faise una
cruz colos deos enriba l'agua al mesmu tiempu que
se diz:

*Pur aiquí pasóu Dios,
pur aiquí la Virxen,*

*si este agua tien venenu,
que lu quiten
ya si non que l'agumite.*

PLANTES MELECINABLES EN XENERAL. — Suel haber siempre, en casa, unes cuantes plantes melecinables, comu por exemplu:

Uriéganu, mui usáu n'agüina escontra'l catarru.

Xanzana, en vinu blancu y azucari ye un bon recostituyente, val p'abrir les ganes de comer y otros coses, hasta pa los anemales malos.

Tomillu, úsase pa faer *fumazus*, fumu pal ganáu enfermu.

Otres plantes mui usaes son la *ruda*, el *romeru*, el *llantén*, la *tila*, la *violeta* y la *manzanilla*.

Les diverses maneres d'algamar y tener en casa estos remedios populares son les mesmes propies de la economía tradicional en xeneral. Delles vegaes ye la *caza* la que da les melecines y otras ye la *re-*

colección. Pero lo más curioso ye que la xente *cultiva* tamién estos remedios y, asina, atópense nos güertos cuadros dedicaos a ruda, apiu o llantén y truébanos pal miel. Dellos usos d'estes melecines paecen tar xuníes a vieyos vezos máxicos y relixosos comu, por exemplu, faer fumu con tomillu pa espantar los malos espíritus.

Va muchu tiempu que nun quedan «especialistes» pa l'aplicación de les melecines populares, anque sigue habiendo xente más enterao nestes temas: qué planta ye la mejor, cómo hai que la poner, hestories de casos concretos del pasáu, etc.

Onde sí queda dalgún qu'otru especialista ye nel tratamientu de les vaques. Segúin me diz P., llámenlu dende otros pueblos tamién pa curar les vaques que los veterinarios nun son pa faer sanar. Esti home usa plantes de les ya vistes y tamién agua osixenada y alcol. Cuandu-y pergunta si tuviera dalguna interferencia col alteiti, díxome que non, qu'él nun cobra nada y ye mui discretu.

